

I. DISPOSICIÓNS XERAIS

CONSELLERÍA DE CULTURA, EDUCACIÓN E ORDENACIÓN UNIVERSITARIA

ORDE do 29 de maio de 2013 pola que se determina o período de vixencia dos libros de texto e demais materiais curriculares.

A disposición adicional primeira do Decreto 89/1993, do 19 de abril, polo que se regulan determinados aspectos en materia de libros de texto e materiais curriculares para as ensinanzas de réxime xeral (DOG núm. 78, do 27 de abril), faculta a persoa titular da consellería competente en materia de educación a ditar as disposicións que exixa o desenvolvemento e execución do decreto.

En consonancia coa política de austeridade do goberno da Xunta de Galicia, no contexto concreto das axudas para a adquisición de libros de texto e materiais curriculares e o período de vixencia destes nos respectivos cursos e ciclos, resulta conveniente efectuar unha adecuación á actual situación económica, coa finalidade de minimizar o impacto nas economías das familias e reforzar a garantía de igualdade de oportunidades no acceso á educación e a calidade do ensino.

Así mesmo, a permanencia dos mesmos libros de texto no centro durante unha etapa prudencial contribúe á dobre finalidade de permitir o uso por distintos membros da familia e de transmitir ao alumnado, desde as primeiras etapas da súa formación, a cultura xeral do uso racional e sustentable dos recursos, e facelo desde un ámbito tan determinante para o seu desenvolvemento futuro como é o educativo.

En consecuencia, de acordo co disposto no artigo 6.2 e no uso das facultades conferidas na disposición adicional primeira do Decreto 89/1993, do 19 de abril, polo que se regulan determinados aspectos en materia de libros de texto e materiais curriculares para as ensinanzas de réxime xeral (DOG núm. 78, do 27 de abril),

DISPOÑO:

Artigo único. *Vixencia dos libros de texto e materiais curriculares*

1. Determinar como período de vixencia dos libros de texto e materiais curriculares para as ensinanzas de réxime xeral seis (6) cursos académicos, contados desde a súa elección.



2. Durante este período só poderán substituírse cando circunstancias excepcionais ou de carácter pedagóxico ou científico o aconsellen, e así o determine a xefatura territorial correspondente desta consellería, logo do informe de inspección educativa, previa solicitude do centro.

Disposición derogatoria. *Derrogación normativa*

Quedan derogadas todas as disposicións de igual ou inferior rango que se opoñan á presente orde.

Disposición derradeira. *Entrada en vigor*

Esta orde entrará en vigor o mesmo día da súa publicación no *Diario Oficial de Galicia*.

Santiago de Compostela, 29 de maio de 2013

José Manuel Pinal Rodríguez
Director xeral de Centros e Recursos Humanos

